



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 30.01.2026. godine

VIJEĆNIČKA PITANJA
POSTAVLJENA NA 14. REDOVNOJ SJEDNICI OPĆINSKOG VIJEĆA VOGOŠĆA
održanoj 29.01.2026. godine

Na 14. redovnoj sjednici Općinskog vijeća vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 14/1.** Na prošloj sjednici sam postavio pitanje, čijim obrazloženjem i odgovorom nisam zadovoljan, pa ću postaviti isto pitanje i zamoliti za dodatno obrazloženje, odnosno konkretan odgovor. Da li su projektnim planom za vodosnabdijevanje gradskim vodovodom u naselju Svrake I obuhvaćene i kuće koje se nalaze na dionici od skretanja za Miholjiće do skretanja za naselje Ravne. Pošto me konkretno zanima ovaj niz kuća, a radi lakšeg shvatanja, priložit ću i isprintano i označeno na google kartama.
- 14/2.** Molim da se provjeri da li se stablo koje je staro i truhlo, te predstavlja sigurnosni rizik po pješake i automobile, nalazi na privatnom ili javnom zemljištu, kako bi se utvrdila nadležnost za njegovo uklanjanje. Stablo se nalazi na dionici puta Semizovac – Donja Vogošća uz samu cestu. Fotografije se nalaze u prilogu.

Vijećnica **Salčin Sabiha (u ime Kluba vijećnika SDA)** postavila je slijedeće vijećničko pitanje:

- 14/3.** Postavljam pitanje nadležnom ministarstvu koji je trenutni status projekta izgradnje Osnovne škole na lokalitetu Rosulje, općina Vogošća.

Obrazloženje:

Naselje Rosulje bilježi stalni porast broja stanovnika, a učenici trenutno pohađaju udaljene škole, što stvara sigurnosne i logističke probleme za roditelje i djecu. Izgradnja osnovne škole na Rosuljama je od strateškog značaja za općinu Vogošća jer će:

- osigurati kvalitetno obrazovanje u lokalnoj zajednici,
- smanjiti opterećenje postojećih škola,
- unaprijediti sigurnost djece i rasteretiti roditelje, te doprinijeti ravnomjernom razvoju infrastrukture u Kantonu Sarajevo.

S obzirom na to da je projekat u javnom interesu i da je još u martu 2023. godine Skupština Kantona Sarajevo donijela odluku o postojanju javnog interesa za osnivanje JU Osnovne škole "Rosulje" u naselju Rosulje, zbog kontinuiranog porasta broja djece i prenatrpanosti postojećih škola "Zahid Baručija" i "Mirsad Prnjavorac", te da je idejni projekat predstavljen još 2020. godine, važno je dobiti jasne informacije o trenutnom statusu i planiranim rokovima realizacije.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

- 14/4.** Da li je u okviru ljetnog održavanja planirano postavljanje klupa u vogošćanskim ulicama i parkovima.

Obrazloženje:

Konkretno pitanje se odnosi na ulicu Skendera Kulenovića. Naime, građane ove ulice, pogotovo starije osobe i lica sa invaliditetom interesuje da li će biti postavljeno još klupa u ovoj ulici. U ulici je postavljen određen broj klupa, ali je taj broj nedovoljan s obzirom na potrebe građana. Klupe bi dobro došle našim starijim građanima i licima sa invaliditetom koji žive u spomenutoj ulici, u Novoj Vogošći i na Rosuljama kada izlaze u šetnju ili kada se

vraćaju iz centra Vogošće svojim kućama. Zbog konfiguracije same ulice, ovim kategorijama je otežano kretanje, tako da klupe dobro dođu za odmor.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

14/5. Postavljam pitanje nadležnoj Policijskoj upravi Vogošća, zašto nema pozornu djelatnost u užem urbanom dijelu općine Vogošća. Već duži vremenski period građani nisu primijetili djelovanje pozornih policajaca na užem području općine Vogošća. Uglavnom su primijećeni policijski službenici koji poslove obavljaju u patrolnom vozilu koji su pretežno fokusirani na kontrolu i sankcionisanje saobraćajnih prekršaja, dok je opća percepcija javnosti da je zanemarena ili zamrla pozorna djelatnost. Građani se osjećaju sigurnije kada vide policajce pozornike u njihovim naseljima i neposrednoj blizini, naročito u urbanim naseljima, u blizini škola, obdaništa, sportskih dvorana, tržnih centara itd. Građani hoće neposrednost, odnosno direktnu i otvorenu komunikaciju sa policijskim službenicima kako bi sa njima razmijenili informacije vezane za sigurnost. Patrolne djelatnosti koje se obavljaju sa službenim vozilima ne daju mogućnost neposredne komunikacije građanima i policiji, one su dobre za brzo djelovanje, ali imaju ograničenja i barijere vezane za komunikaciju sa građanima i neposrednosti. Stoga smatramo da je potrebno da Policijska uprava Vogošća obezbijedi pozornu djelatnost gdje će policijski službenici biti vidljivi u urbanom dijelu Vogošće i kojim će se građani moći obratiti po bilo kojem pitanju vezanom za sigurnost.

14/6. Postavljam pitanje nadležnoj općinskoj službi, kada će biti postavljena bolja rasvjeta oko Srednjoškolskog centra Vogošća. Naime, prostor oko škole u Vogošći je veoma loše osvijetljen, što je pogodno za vršenje različitih devijantnih ponašanja i okupljanju kriminogenih lica koja mogu ugroziti sigurnost učenika navedene škole. Također, mračni i loše osvijetljeni prostori su pogodan prostor za okupljanje lica sklonih uživanju narkotičkih sredstava i drugih nedozvoljenih supstanci. S tim u vezi, kako bi se poboljšala sigurnost oko Srednjoškolskog centra, potrebno je navedeni prostor osvijetliti boljom rasvjetom.

Vijećnica **Džano Emina (u ime Kluba vijećnika NiP)** postavila je slijedeće vijećničko pitanje:

14/7. Do kada će pasarela u Hotonju biti zatvorena, kada će nadležni (uopće me ne zanima ko je to) konačno ozbiljno pristupiti rješavanju problema pasarele, kada će se pasarela osposobiti i ponovo staviti u funkciju naših građana i građanki. Obzirom da smo ostali uskraćeni za informaciju o dokumentaciji koja je bila potrebna za samu izgradnju pasarele, dozvole itd.. da li je sada ta dokumentacija dostupna.

Vijećnik **Pašić Edin (u ime Kluba vijećnika SDA)** postavio je slijedeće vijećničko pitanje:

14/8. Obzirom na upite određenog broja poljoprivrednih proizvođača koji nisu ostvarili pravo na poticaj za proizvodnju u prethodnoj godini, a u cilju izbjegavanja istih grešaka u tekućoj godini postavljam pitanje Ministarstvu privrede Kantona Sarajevo uz dostavu informacija u vezi s realizacijom poticaja u poljoprivrednoj proizvodnji, a u okviru Mjere novčanih podsticaja – pčelinjak, koji se provodi putem Ministarstva privrede Kantona Sarajevo: koliki je ukupan broj korisnika koji su ostvarili pravo na poticaj po navedenom modelu - pčelinjak kroz "ODLUKU O UKUPNOM IZNOSU NOVČANIH PODSTICAJA, PROGRAMU UTROŠKA SREDSTAVA I ROKOVIMA ZA PODNOŠENJE ZAHTEJEVA ZA 2025. GODINU". Koliki je ukupan broj zaprimljenih zahtjeva po istom za predhodnu godinu. Koji su to bili najčešći razlozi zbog kojih korisnici nisu ostvarili pravo na poticaj.

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

14/9. U ime grupe građana MZ Vogošća II, naselja Bradići, odnosno ulice Jošanica III, postavljam vijećničko pitanje nadležnoj općinskoj službi kao i Centru za socijalni rad Vogošća. Obzirom da se u ovom naselju nalazi lice koje se već duži niz godina nalazi u stanju socijalne potrebe kao i potrebe za adekvatnom medicinskom i drugom negom, a da isto živi u uslovima koji ne ispunjavaju ni minimum potrebnih za normalan život, građani koji pokušavaju da pomognu i nađu rješenje za svog komšiju svjesni su da to ne mogu adekvatno uraditi bez sistema države odnosno nadležnih službi, te traže da im se dostave odgovori, a posebno iz Centra za socijalni rad Vogošća:

1. Ko je trebao poduzeti zakonom propisane mjere i radnje na zaštiti ovog lica koje je nalazi u ovakvo teškom stanju bez ličnih dokumenata, zdravstvene zaštite, bez struje, vode, grijanja i bilo kakvih primanja.
2. Da li je Centar ikada evidentirao ovo lice u stanju socijalne potrebe i na osnovu kojih prijava, kao i šta je po tom pitanju uradio.
3. Koliko puta je izvršen terenski obilazak i ko je zadužen za postupanje u ovakvom slučaju, koje stručno lice, služba ili institucija.
4. Da li Centar ima zakonsku obavezu da periodično po službenoj dužnosti pokreće postupak, izvršava terenski obilazak, upućuje na medicinsko vještačenje, pribavlja medicinsku i drugu dokumentaciju kako bi dobio puni uvid u socijalno stanje ovog lica.
5. U konkretnom slučaju ovog lica da li će nadležna služba Općine Vogošća, Centra za socijalni rad kao i sve druge službe u čijoj nadležnosti su ovakvi slučajevi djelovati i kada, obzirom na izuzetno stanje i životnu ugroženost ovog lica.

Obzirom na osjetljivost stanja ovog lica, kao i na poštivanje privatnosti odnosno zakonske zaštite ličnih podataka ime i prezime, kao i adresu ovog lica ću lično dostaviti službi, kako bi nadležnima mogli prolijediti pitanje.

Vijećnica **Čomaga Almedina (u ime Kluba vijećnika SDA)** postavila je slijedeće vijećničko pitanje:

14/10. Postavljam pitanje nadležnom KJKP „Park“ u vezi održavanja ulične rasvjete na području općine Vogošća. Po prijavi građana na području MZ Vogošća II koji bilježe česte prekide u radu rasvjetnih tijela u ulicama 24. Juna, Skendera Kulenovića i Vogošćanskih odreda. Možemo primijetiti da u ovim ulicama dolazi do čestih prekida, gdje kompletne ulice budu u totalnom mraku ili dijelovi tih ulica. U komunikaciji sa građanima rečeno je da su se u više navrata obraćali nadležnom preduzeću putem online prijave gdje nisu dobijali adekvatne odgovore ili ih najčešće nije bilo nikako. Molim odgovor, iz kojeg razloga vaše službe ne odgovaraju adekvatno svojim zadacima, te zašto i nakon popravki dolazi do ponovnih kvarova na rasvjetnim tijelima u vrlo kratkom periodu na ovom području.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

14/11. U kojoj je fazi i da li je planirano rješavanje problema klizišta u naselju Orahov Brijeg ?

Obrazloženje:

Stanovnici naselja Orahov Brijeg se već duži vremenski period suočavaju sa problemom klizišta koje predstavlja ozbiljnu prijetnju sigurnosti ljudi, objekata i infrastrukture. Zbog učestalih upita i zabrinutosti građana sa ovog područja, smatram neophodnim da nadležne općinske službe dostave jasne, tačne i konkretne informacije o trenutnom stanju, kao i o daljim koracima u vezi sa rješavanjem ovog problema.

14/12. U kojoj je fazi izrada projektne dokumentacije za sanaciju pješačke pasarele u naselju Hotonj, te kada se može očekivati početak konkretnih radova na njenoj sanaciji.

Obrazloženje:

Ovo vijećničko pitanje upućujem zbog dugotrajnog i još uvijek neriješenog problema lošeg stanja pješačke pasarele u naselju Hotonj, koju ne mogu više koristiti mještani, a posebno učenici koji tim putem dolaze do škole. Kako je školska godina već započela, sigurnost djece i ostalih pješaka na ovom području postaje još urgentnije pitanje. U prethodnom periodu zaprimili smo odgovor da je navedena pasarela u nadležnosti Općine, te je tom prilikom najavljeno da će se pristupiti izradi projektne dokumentacije za njenu sanaciju. S tim u vezi postavljam navedeno pitanje.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

14/13. Pitanje upućujem Ministarstvu obrazovanja Kantona Sarajevo. U kojim srednjim školama na području Kantona Sarajevo i za koje obrazovne profile se trenutno primjenjuje model dualnog obrazovanja, koliki je tačan broj učenika uključenih u ovaj model po školama i obrazovnim profilima, te na osnovu kojih odluka, programa ili pilot-projekata je isti uveden. Da li Ministarstvo raspolaže analizama efekata dosadašnje primjene dualnog obrazovanja, te da li su izrađene analize potreba tržišta rada i interesa poslodavaca kao osnov za eventualno proširenje ovog modela. Također, da li Ministarstvo planira proširenje dualnog

obrazovanja u narednom periodu, u kojim školama i obrazovnim profilima, u kojem vremenskom okviru, te sa kojim planiranim finansijskim sredstvima.

- 14/14.** Molim Kantonalnu upravu za inspeksijske poslove Kantona Sarajevo da mi dostavi pisanu informaciju o broju izvršenih službenih obilazaka, inspeksijskih nadzora i drugih aktivnosti komunalnih redara na području općine Vogošća, za period posljednjih 12 mjeseci, odnosno za 2025. godinu. U okviru odgovora molim da se precizira: ukupan broj izvršenih nadzora i obilazaka na području općine Vogošća, pravni osnov i povod za postupanje (redovni nadzori, postupanje po prijavama građana, planske ili vanredne aktivnosti), struktura poduzetih mjera (upozorenja, prekršajni nalozi, rješenja i druge mjere), te oblasti i lokacije na kojima su nadzori najčešće vršeni.

Vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

- 14/15.** Povodom nedavno potpisanog ugovora između Općine Vogošća i IDEEA-e o uvođenju elektronskog potpisa, postavljam pitanje Službi za opću upravu Općine Vogošća: Da li je u ovom trenutku elektronski potpis u Općini Vogošća dostupan isključivo fizičkim licima ili ga mogu koristiti i pravna lica (privredni subjekti, udruženja i dr.).
- 14/16.** Kolika je dosadašnja zainteresovanost građana Općine Vogošća za pristupanje sistemu elektronskog potpisa, odnosno koliko ima podnesenih zahtjeva ili izdatih elektronskih potpisa od početka implementacije sistema.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

- 14/17.** Često u Dom zdravlja dolaze emailovi o neispravnosti vode za piće u Vogošći. Jedan od takvih je bio 20. januara ove godine i on je glasio: „Obavještavam Vas da je, prema rezultatima mikrobioloških ispitivanja, voda iz lokalnih vodovoda Krivoglavci, Sedam vrela, Tihovići i Paljevo zdravstveno neispravna za upotrebu do daljnjeg (dok ne stigne ispravan nalaz). S obzirom na mogući rizik po zdravlje stanovništva, potrebno je da se o navedenom službenim putem obavijeste sve ambulate koje teritorijalno pripadaju Domu zdravlja Vogošća, kako bi zdravstveni radnici imali jasnu informaciju o neispravnosti vode za piće i pripremu hrane, te da se u svakodnevnom radu obrati posebna pažnja na pacijente sa gastrointestinalnim i febrilnim simptomima koji su eventualno konzumirali ovu vodu. Također je važno da se svi sumnjivi slučajevi koji bi se mogli dovesti u vezu sa konzumacijom zdravstveno neispravne vode evidentiraju i da se izvrši njihovo propisano prijavljivanje, radi pravovremenog praćenja i poduzimanja potrebnih mjera. Molim odgovor od naležne službe općine Vogošća, da odgovori građanima Vogošće, šta je uzrok za često neispravnu vodu za piće i šta se poduzima kako bih se ovaj problem riješio i sačuvalo zdravlje stanovništva Vogošće.
- 14/18.** S obzirom na dugogodišnje probleme u oblasti komunalnih usluga na području općine Vogošća (javna čistoća, održavanje zelenih površina, komunalna higijena....), kao i značajna budžetska sredstva koja se izdvajaju za ove namjene putem vanjskih izvršilaca, postavljam vijećničko pitanje vezano za osnivanje javnog komunalnog preduzeća Općine Vogošća. Da li je Općina Vogošća razmatrala mogućnost osnivanja vlastitog javnog komunalnog preduzeća u 100% općinskom vlasništvu, te ako jeste – u kojoj je fazi ta inicijativa, a ako nije koji su razlozi da se ista ne pokrene. Također molim da se dostave sljedeće informacije pismenim putem:
1. Koliki su godišnji troškovi Općine Vogošća za komunalne usluge koje obavljaju eksterni subjekti.
 2. Da li je rađena ili planirana analiza isplativosti osnivanja javnog komunalnog preduzeća.
 3. Da li postoji namjera da se u narednom periodu Općinskom vijeću predloži odluka o osnivanju istog.
- Smatram da bi osnivanje javnog komunalnog preduzeća moglo doprinijeti efikasnosti i ekonomičnosti u pružanju komunalnih usluga, boljoj kontroli kvaliteta usluga i racionalnije trošenje budžetskih sredstava, te molim da se ovo pitanje razmotri sa posebnom pažnjom.

Vijećnik **Kulo Mumaer (u ime Kluba vijećnika SDA)** postavio je slijedeće vijećničko pitanje:

14/19. Zbog lošeg stanja upućujem pitanje prema nadležnoj službi Općine Vogošća, kada možemo očekivati uređenje autobusnog stajališta Poturovići, MZ Semizovac.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

14/20. U ime velikog broja građana koji svakodnevno putuju na posao, školu i fakultete na relaciji Vogošća – Sarajevo, postavljam pitanje prema KJKP GRAS d.o.o. Sarajevo i Ministarstvu saobraćaja Kantona Sarajevo. Zbog čega se jutarnjim satima u periodu od 06³⁰ do 08⁰⁰ ne poštuje važeći red vožnje trolejskog saobraćaja, te se učestalo dešava da se po jedan do dva uzastopna termina vožnje preskoče, bez ikakvog prethodnog obavještenja putnika? (vjerovatno se to dešava i u drugim terminima). Građani ukazuju da ovakva praksa:

- dovodi do ozbiljnih kašnjenja na posao i u škole,
- stvara velike gužve i preopterećenje narednih polazaka,
- narušava povjerenje u javni prijevoz kao osnovnu javnu uslugu,
- posebno pogađa radnike, učenike i studente koji zavise isključivo od javnog prijevoza.

S obzirom da se radi o najopterećenijoj relaciji u jutarnjim satima, postavlja se pitanje:

- da li KJKP GRAS raspolaže dovoljnim brojem vozila i vozača u jutarnjim terminima,
- da li postoje operativni ili organizacioni problemi koji uzrokuju preskakanje polazaka,
- te zašto putnici nisu pravovremeno informisani o izmjenama u saobraćaju.

Također tražim da se građanima i Općinskom vijeću dostavi:

- obrazloženje razloga nepoštivanja reda vožnje,
- plan mjera za osiguranje redovnosti trolejskog saobraćaja na relaciji Vogošća – Sarajevo,
- informacija o eventualnim korekcijama reda vožnje u skladu sa realnim kapacitetima, kako bi se izbjegla praksa preskakanja termina.

Smatramo da je pouzdan i redovan javni prijevoz osnovni preduslov normalnog funkcionisanja grada i općina, te da građani Vogošće zaslužuju jasan odgovor i konkretna rješenja.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

14/21. Utvrđivanje odgovornosti i dostava dokumentacije za pasarelu, pješački prelaz, preko magistralnog puta M18 u MZ Hotonj, općina Vogošća. Koristeći pravo izabranog općinskog vijećnika na nadzor rada izvršne vlasti i javnih institucija, postavljam vijećničko pitanje u vezi izgradnje, tehničke ispravnosti, održavanja i zatvaranja pasarele- pješačkog prelaza preko magistralnog puta M18, na području Mjesne zajednice Hotonj u Općini Vogošća. Pasarela je izgrađena prije otprilike 15 i više godina, a zatvorena je u septembru 2025. godine zbog potpune dotrajalosti i ozbiljnih oštećenja uzrokovanih korozijom metalnih površina, što ukazuje na mogući ozbiljan propust u projektovanju, izvođenju, nadzoru i održavanju ovog objekta (pasarele). Posebno zabrinjava činjenica da nakon nekoliko postavljenih vijećničkih inicijativa i pitanja niti jedna institucija se ne oglašava kao odgovorna, niti postoji javno dostupna dokumentacija kojom bi se potvrdila zakonitost izgradnje i sigurnost objekta u periodu njegove upotrebe. S tim u vezi, zahtijevam da mi se, u skladu sa važećim propisima, dostavi kompletna dokumentacija koja se odnosi na :

- Investitora pasarele
- Izrađivača i odobrenja projektne dokumentacije
- Izvođača radova i stručni nadzor
- Zapisnik o tehničkom prijemu i izdavanje upotrebne dozvole
- Ateste i elaborat o nosivosti i sigurnosti objekta
- Plan i evidenciju redovnog i vanrednog održavanja
- Pravni osnov i akt po kojem je pasarela zatvorena za upotrebu
- Precizno navođenje subjekta odgovornog za održavanje i sigurnost pasarele

Ukoliko Općina Vogošća ne raspolaže navedenom dokumentacijom, a trebala bi, zahtijevam da mi se jasno navede koja je institucija nadležna, iz kojih razloga dokumentaciju nema Općina Vogošća i zašto nije dostupna, kao i da li je ikada izvršena revizija sigurnosti objekta od njegovog puštanja u upotrebu do dana zatvaranja. Smatram neprihvatljivim da infrastrukturni objekat ovakvog značaja, koji se nalazi iznad magistralnog puta, može biti izgrađen, korišten i zatvoren bez jasno utvrđene odgovornosti i potpune dokumentacije (nadležnosti), te očekujem konkretan i nedvosmislen odgovor na moje vijećničko pitanje.

14/22. Zašto nadležna općinska služba nije uputila urgentni zahtjev nadležnim institucijama viših nivoa vlasti i odgovornim ustanovama za hitno uklanjanje pasa litalica sa ulica općine Vogošća. Ko je odgovoran za činjenicu da se ne reaguje, iako je postavljeno niz pitanja i inicijativa o problemima koje stvaraju psi litalice već duži vremenski period gdje postoji realna i stalna opasnost od napada i ugriza. Da li nadležni svjesno preuzimaju rizik da dođe do teških tjelesnih povreda ili smrtonosnog ishoda i zašto se čeka tragedija da bi se pokrenule procedure koje su morale biti pokrenute na vrijeme kako bi se izbjegla tragedija? Smatram krajnje neprihvatljivim ignorisanje problema pod iskazom da je nadležna općinska služba izgubila nadležnost koja direktno ugrožava sigurnost stanovništva. Tražim od nadležne općinske službe konkretan akt po kojem su se obraćali nadležnima, a koji su ignorisali da riješe problem koji je u njihovoj nadležnosti. Svako dalje odlaganje smatram svjesnim zanemarivanjem obaveze prema građanima općine Vogošća.

Vijećnik **Bogilović Enis (u ime Kluba vijećnika NiP)** postavio je slijedeće vijećničko pitanje:

14/23. Postavljam pitanje zbog poplava u naselju Barice, dali je uključen ljudski faktor i da li je moguće uraditi sanaciju ili neki projekat da se uradi adekvatno da ubuduće ne bi dolazilo do ovih nemilih problema.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26
Vogošća, 30.01.2026.godine

INICIJATIVE POKRENUTE
NA 14. REDOVNOJ SJEDNICI OPĆINSKOG VIJEĆA VOGOŠĆA
održanoj 29.01.2026. godine

Na 14. redovnoj sjednici Općinskog vijeća vijećnik **Omerović Denis (u ime Kluba vijećnika SDP)** pokrenuo je slijedeće inicijative:

- 14/1.** Pokrećem inicijativu prema nadležnim službama za ocrtavanje parking mjesta za osobe sa invaliditetom – Omladinska 29.

Obrazloženje:

Ranije sam pokretao inicijativu za postavljanje znaka i ocrtavanje parking mjesta za osobe s invaliditetom na adresi Omladinska 29. Trenutno je postavljen samo znak, dok parking mjesto nije ocrtano, čime se smanjuje njegova vidljivost i ne doprinosi dovoljnom podizanju svijesti građana o postojanju ovog parking mjesta. Prema navodima policije, u slučaju nepoštivanja znaka nisu u mogućnosti sankcionisati nepropisno parkirana vozila, jer mjesto nije ocrtano. Stoga pokrećem inicijativu da se parking mjesto propisno ocrti.

- 14/2.** Pokrećem inicijativu za prilagođavanje trotoara u Semizovcu osobama s invaliditetom.

Obrazloženje:

Pokrećem inicijativu da se u Semizovcu, u zoni Energopetrol pumpe, izvrši prilagođavanje trotoara za kretanje roditelja s dječjim kolicima i osoba s invaliditetom koje koriste kolica. Trenutno su trotoari podignuti i neprilagođeni, zbog čega je pristup autobusnoj stanici otežan ili gotovo nemoguć. Također, na trotoaru koji se nalazi u sklopu i vodi preko mosta u Semizovcu situacija je identična, te su roditelji s dječjim kolicima i osobe sa invaliditetom u kolicima primorani se kretati magistralnim putem, što je zbog velike frekvencije saobraćaja izuzetno opasno i praktično neizvodivo. Molim da se razmotri korekcija i prilagođavanje trotoara na navedenim lokacijama, u cilju povećanja sigurnosti i omogućavanja jednakog pristupa svim građanima.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeće inicijative:

- 14/3.** Pokrećem inicijativu prema nadležnoj općinskoj službi za rješavanje oborinskih voda koje se izljevaju u ulici Abaza Zekovića iznad kuće porodice Plakalo.

Obrazloženje:

Naime već duži vremenski period u ulici Abaza Zekovića, kod kuće porodice Plakalo dolazi do izlivanja oborinskih voda na cestu, što vozačima i pješacima stvara ozbiljan problem, pogotovo u zimskom periodu kada ista zaleđi i stvori velike slojeve leda koje je nemoguće ukloniti. Građani ovog naselja su više puta tražili rješavanje ovog problema, ali adekvatne reakcije od nadležnih u Općini Vogošća nije bilo. Osim usmenog obećanja da će se to riješiti u okviru projekta tunela Kobilja Glava, od strane Zavoda. Obzirom da su se građani obratili nadležnim dobili su odgovor da je Zakonom o komunalnim djelatnostima odvodnja oborinskih voda u nadležnosti Općine, tražim da nadležna općinska služba što hitnije pristupi rješavanju ovog problema. Obzirom da je od mjesta gdje se izliva voda na put, do kanizacionih cijevi koje postoje budaljenost između 5 i 6 metara, građani nisu sami smjeli da izvrše ovu intervenciju odnosno ucjevljenje, jer je neopodno izvršiti prokop asfalta (javnog puta), a što zahtjeva posebno odobrenje nadležne službe.

- 14/4.** Pokrećem inicijativu da Općina Vogošća i nadležna općinska služba napokon riješi nadležnost čišćenja ulica Šipska, Abaza Zekovića i Sulejmana Omerovića Cara sa nadležnom službom Općine Centar.

Obrazloženje:

Obzirom da se dijelovi pomenutih ulica nalaze na teritoriji obje općine tj. Općine Vogošća i Općine Centar, kada dođe do snježnih padavina i drugih potrebnih intervencija Općina Vogošća, kao ni Općina Centar ne čiste pomenute ulice, a kada građani upute poziv dobijaju odgovore koji prebacuju odgovornost jednih na druge što na kraju rezultira uskraćenosti pružanja usluga građanima. Molim nadležnu službu da sa nadležnom službom Općine Centar riješi ovaj problem i da dogovori nadležnost zimskog održavanja ceste, kako građani ne bi bili uskraćeni za pružanje adekvatne usluge.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

- 14/5.** Pokrećem inicijativu nadležnoj općinskoj službi za uspostavljanje multifunkcionalnog centra za mlade i porodicu u okviru Kulturno-sportskog centra Vogošća, ili nekog drugog primjerenog prostora.

Obrazloženje:

Predlaže se izgradnja ili adaptacija postojećeg objekta u multifunkcionalni centar koji bi služio kao prostor za edukaciju, sport, kulturu i društvene aktivnosti. Centar bi uključivao:

- Prostor za radionice i edukativne programe (IT obuke, kursevi jezika, kreativne radionice)
- Sportske sadržaje (teretana, sala za rekreaciju, prostor za omladinske sportove)
- Kulturne aktivnosti (biblioteka, prostor za izložbe, muzičke i dramske sekcije)
- Savjetovalište za porodice i mlade (psihološka podrška, karijerno savjetovanje).

Dosta ovih aktivnosti se već realizuje u okviru Kulturno-sportskog centra Vogošća, pa je potrebno jako malo dodatnih ulaganja. Razlozi za formiranje jednog ovakvog centra:

- Nedostatak sadržaja za mlade i porodice dovodi do pasivnosti i odlaska mladih iz lokalne zajednice.
- Multifunkcionalni centar bi poticao društvenu koheziju, zdrav način života i razvoj novih vještina.
- Projekat se može realizovati kroz javno-privatno partnerstvo ili apliciranjem na fondove EU za lokalni razvoj.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 14/6.** Pokrećem inicijativu prema nadležnoj službi i Općinskom vijeću, da se mladi bračni parovi do 35 godina starosti, koji prvi put rješavaju stambeno pitanje oslobode plaćanja rente na stambeni prostor do 50 m² na području općine Vogošća.

Obrazloženje:

Obzirom da je stanogradnja i izgradnja objekata za stanovanje postala veoma skupa po kvadratnom metru, tako da na području općine Vogošća cijena stanogradnje je viša od 3.500,00 KM po kvadratnom metru i da jedan stan od 50 metara kvadratnih košta u prosjeku preko 175.000,00 KM, te da je izgradnja individualnih objekata veoma skupa. Kako bi se dao poticaj mladim za sklapanje brakova, rješavanje stambenog pitanja, formiranje porodice i zadržali u Bosni i Hercegovini, pokrećem inicijativu da se mladi bračni parovi do 35 godina starosti, koji prvi put rješavaju stambeno pitanje oslobode plaćanja rente na stambeni prostor do 50 metara kvadratnih. Navedenom inicijativom bi se mladim olakšao proces rješavanja stambenog pitanja, osamostaljenje i ostanka u Bosni i Hercegovini. Obzirom da imamo veliki odljev mladih ljudi sa prostora Bosne i Hercegovine, jedan od razloga je i što nemaju riješeno stambeno pitanje kako bi zasnovali svoje porodice. Usvajanjem ove inicijative mladim bračnim parovima bi se olakšalo pri rješavanju njihovog važnog životnog pitanja.

- 14/7.** Pokrećem inicijativu prema nadležnoj općinskoj službi, da se ATV klub „Motka” kao pravno lice uvrsti u sistem Civilne zaštite općine Vogošća i da mu se dodijele budžetska sredstva.

Obrazloženje:

Naime, ATV klub „Motka“, već duži vremenski period djeluje na području općine Vogošća sa svojim sportskim, humanitarnim i društveno korisnim radom. Navedeni klub je na području općine Vogošća organizovao više sportskih manifestacija koje su se odnosile na

obilježavanje i sjećanje na njenog istaknutog člana i humanitarca rahmetli Semira Botića, koji je živio i djelovao na području općine Vogošća, na kojem se okupi veliki broj članova različitih ATV klubova sa područja cijele Bosne i Hercegovine. Pored obilježavanja navedenog okupljanja, ATV klub „Motka” redovno organizuje obilježavanje značajnih važnih datuma za Bosnu i Hercegovinu, značajnih datuma vezanih za odbranu Bosne i Hercegovine, akcije čišćenje smeća, otpada, snijega i gašenja požara, na području općine Vogošća. Učestvovao je u pomaganju ugroženim područjima, unesrećenim elementarnim nepogodama kao što je bio slučaj poplava u Jablanici. Također, klub ATV „Motka” je proveo desetine humanitarnih akcija materijalne pomoći ugroženim kategorijama stanovništva kako na području općine Vogošća, tako i na području drugih općina, kao i spašavanju i pronalasku unesrećenih i nestalih naročito u padinskim dijelovima općine Vogošća, koji su pogodni za planinarenje. Klub ATV „Motka” je jedan od najaktivnijih klubova u Bosni i Hercegovini, vezanih za dobrotvorni, humanitarni i društveno koristan rad i zaštitu. Iz navedenih razloga potrebno je da Općinsko Vijeće Vogošća usvoji ovu inicijativu, a nadležna služba uvrsti klub ATV „Motka” u sistem civilne zaštite, te da im se dodjele budžetska sredstva za nabavku opreme koja će se koristiti za zaštitu i spašavanje stanovništva Vogošće.

Vijećnica **Džano Emina (u ime Kluba vijećnika NiP)** pokrenula je slijedeću inicijativu:

- 14/8.** Pokrećem inicijativu da se privremeni pješački prelaz u Hotonju osvijetli, po uzoru na pješački prelaz u ulici Jošanička, tačnije kod BBI Banke. Mislim da dodatna obrazloženja za inicijativu nisu potrebna.

Vijećnik **Pašić Edin (u ime Kluba vijećnika SDA)** pokrenuo je slijedeće inicijative:

- 14/9.** Pokrećem inicijativu prema Turističkoj zajednici Kantona Sarajevo, s ciljem unapređenja promocije izletišta i prirodnog potencijala planine Motka. Motka predstavlja vrijedan prirodni resurs Općine Vogošća i Kantona Sarajevo – područje bogato šumama, čistim zrakom, planinarskim stazama i planinarskim domom, te je već dugi niz godina omiljeno odredište planinara, rekreativaca, porodica i izletnika. Uprkos tome, Motka je trenutno nedovoljno zastupljena u zvaničnim turističkim kanalima i nije adekvatno promovirana kao izletišta koje zaslužuje pažnju domaćih i stranih posjetilaca. Pokrećem inicijativu da se izletišta i planina Motka uvrste na zvaničnu web stranicu Turističke zajednice Kantona Sarajevo (visitsarajevo.ba) i da se Motka uključi u širu promociju prirodnih i izlet destinacija Kantona Sarajevo. Smatram da bi ovakva promocija doprinijela razvoju održivog i izlet turizma, rasterećenju najposjećenijih destinacija i većoj vidljivosti prirodnih ljepota Kantona Sarajevo.
- 14/10.** Pokrećem inicijativu prema Službi za privredu, integrisani lokalni razvoj i društvene djelatnosti da se potencijal koji donosi LED displej ispred zgrade Općine iskoristi i za promociju izletišta i prirodnog potencijala planine Motka, jednog od najznačajnijih prirodnih i rekreativnih lokaliteta na području naše općine. S tim u vezi, predlažem da se putem LED displeja periodično emituju kratke promotivne poruke i vizuali o izletištu i planini Motka eventualno pripremljene i sa RTV Vogošća. Ovim bi se građani dodatno informisali o prirodnim ljepotama koje nudi Motka i istakne Motka kao lokalna izlet destinacija Općine Vogošća.

Vijećnica **Karović Amra (u ime Kluba vijećnika SDP)** pokrenula je slijedeću inicijativu:

- 14/11.** Pokrećem inicijativu da zdravstveni radnici i ljekari dobiju status službenog lica.

Obrazloženje:

Nije nepoznanica da zdravstveni radnici i ljekari širom Bosne i Hercegovine trpe nasilje. Svaki napad na zdravstvenog radnika treba biti tretiran kao napad na službene osobe, što ustvari predstavlja krivično djelo. Verbalni napadi se dešavaju na svakodnevnoj osnovi. Nažalost posljednji napad je bio i fizički napad u Domu zdravlja Vogošća. Prema krivičnom Zakonu napad na službeno lice se tretira kao krivično djelo. Neophodno je napraviti inovacije u okviru prekršajnog zakonodavstva, te na taj način pokušati zaštititi one koji su se u svom profesionalnom životu opredjelili da liječe druge. Inicijativu upućujem nadležnim kantonalnim ministarstvima.

Vijećnik **Gljiva Avdo (u ime Kluba vijećnika DF)** pokrenuo je slijedeće inicijative:

- 14/12.** Pokrećem inicijativu da se na parceli k.č. 797/1, K.O. Vogošća, koja se nalazi u ulici Vogošćanskih odreda, izvrši uređenje zelene površine kroz hortikulturno uređenje prostora, uz postavljanje klupa za odmor i korpi za otpatke.

Obrazloženje:

U ulici Vogošćanskih odreda nalazi se veliki broj stambenih objekata, a samim tim i značajan broj stanovnika različitih starosnih kategorija. Na navedenom lokalitetu trenutno ne postoji adekvatan prostor za kraći odmor, boravak na otvorenom i rekreaciju, posebno za starije osobe, roditelje s djecom i ostale građane. Predmetna parcela predstavlja pogodan i funkcionalan prostor koji se može urediti u manju zelenu oazu, dostupnu svim građanima ovog dijela naselja. Uređenjem zelenih površina, postavljanjem klupa i korpi za otpatke, prostor bi dobio društvenu, ekološku i estetsku vrijednost, te bi doprinio unapređenju kvaliteta života stanovnika i očuvanju urednosti prostora.

- 14/13.** Pokrećem inicijativu za postavljanje zaštitne ograde u naselju Svrake – ulica Ravne.

Obrazloženje:

Pokrećem inicijativu prema nadležnoj općinskoj službi da se u što kraćem roku započne s aktivnostima na postavljanju zaštitne ograde u naselju Svrake, u ulici Ravne, na dionici od broja 6., do Mehtefčića, gdje zaštitna ograda djelimično već postoji. Na navedenoj dionici je do prošle godine uz cestu postojala linija drveća, koja je barem djelimično, predstavljala prirodnu barijeru i doprinosila sigurnosti učesnika u saobraćaju. S obzirom na to da je drveće u međuvremenu uklonjeno, predmetna dionica ostala je bez ikakve zaštite. U slučaju eventualnog izlijetanja vozila s kolovoza, postoji realna opasnost da vozilo završi u koritu rijeke Bosne, budući da trenutno ne postoji prepreka koja bi spriječila takav ishod. Iz navedenih razloga smatram da je postavljanje zaštitne ograde na ovoj lokaciji neophodno radi povećanja sigurnosti saobraćaja i zaštite ljudskih života.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeću inicijativu:

- 14/14.** U ime građana ulice Spasoje Blagovčanina tačnije kod zgrade sa brojem 20., pokrećem inicijativu da se kod ocrtanih parking mjesta za invalide postavi i znak dozvoljeno parkiranje samo za osobe sa invaliditetom.

Obrazloženje:

Na pomenutom parking prostoru ocrтана su invalidska mjesta, ali ne postoji znak koji upućuje da je parking samo za osobe sa invaliditetom, tako da građani ovoga dijela kada pozovu policiju neodgovornim pojedincima koji parkiraju na ta invalidska mjesta, dobiju obrazloženje od policijskih službenika da zbog nepostojanja znaka ne mogu reagovati odnosno sankcionisati takve neodgovorne vozače i da je potrebno da bude istaknut saobraćajni znak koji će upućivati da su mjesta rezervisana za lica sa invaliditetom.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 14/15.** Pokrećem inicijativu za donošenje Smjernica za trogodišnje planiranje rada Općine Vogošća za period 2025 –2027. godine.

Obrazloženje:

Izrada Smjernica za trogodišnje planiranje rada Općine Vogošća za period 2025–2027. godine (u daljem tekstu: Smjernice) predstavlja zakonsku obavezu utvrđenu Uredbom o trogodišnjem i godišnjem planiranju rada, monitoringu i izvještavanju u Federaciji Bosne i Hercegovine („Službene novine Federacije BiH“, broj: 74/19 i 2/21) (u daljem tekstu: Uredba). U skladu s navedenom Uredbom, Smjernice se pripremaju svake godine za period od tri godine, po principu (1+2), te trebaju sadržavati minimalne elemente propisane Uredbom. One predstavljaju osnovni planski dokument koji omogućava usklađeno, sistematično i transparentno planiranje rada organa uprave u srednjoročnom periodu. Smjernice se izrađuju na osnovu Strategije razvoja Općine Vogošća za period 2023–2027. godine, s ciljem fokusiranja na ključne razvojne pravce i osiguranja dosljedne implementacije strateškog okvira. Njihova uloga nije samo operativna, već i strateška, jer omogućavaju povezivanje strateških ciljeva sa godišnjim i trogodišnjim planovima rada. Posebno ističem da smo se, usvajanjem Strategije razvoja Općine Vogošća 2023–2027, izričito obavezali da ćemo u okviru poglavlja „Plan provođenja, praćenja, evaluacije i izvještavanja Strategije razvoja“ provoditi redovnu izradu smjernica trogodišnjeg planiranja. Međutim, ova praksa do sada nije bila uspostavljena, iako predstavlja ključni mehanizam za praćenje realizacije strateških ciljeva i unapređenje sistema upravljanja razvojem na lokalnom nivou. Pored značaja za rad organa uprave, Smjernice imaju i širi društveni efekat,

jer mogu služiti kao orijentacioni dokument i ostalim zainteresovanim stranama, uključujući institucije, organizacije civilnog društva i druge vaninstitucionalne aktere, u planiranju i implementaciji projekata i aktivnosti u narednom trogodišnjem periodu. S obzirom na navedeno, predlažem da se:

1. Pokrene procedura izrade i donošenja Smjernica za trogodišnje planiranje rada Općine Vogošća za period 2025–2027. godine, u skladu sa važećom Uredbom;
2. Izrada i donošenje Smjernica uvrsti u Program rada Općinskog vijeća Vogošća, kao obavezna i kontinuirana praksa za buduće planske cikluse, čime bi se osiguralo poštivanje zakonskih obaveza i dosljedna primjena usvojenog strateškog dokumenta.

Smatram da bi usvajanje ove inicijative predstavljalo važan korak ka unapređenju planskog, odgovornog i transparentnog upravljanja razvojem Općine Vogošća.

- 14/16.** Pokrećem inicijativu za hitnu sanaciju i tehničko učvršćivanje oštećenih kamenih kocki na vanjskoj strani spomenika kraj saobraćajnice u kružnom toku Vogošćanske petlje.

Obrazloženje:

Na vanjskoj ivici saobraćajnice u kružnom toku Vogošćanske petlje evidentna su oštećenja, pomjeranja i destabilizacija kamenih kocki koje se nalaze neposredno uz kolovoz. Imajući u vidu da se radi o izuzetno frekventnom kružnom toku i jednom od važnijih saobraćajnih čvorišta na području općine, navedena oštećenja predstavljaju ozbiljnu prijetnju sigurnosti svih učesnika u saobraćaju. Postoji realna opasnost da usljed daljnjeg propadanja ili odvajanja kamenih elemenata isti dospiju na saobraćajnicu, što može uzrokovati oštećenje vozila, gubitak kontrole nad vozilom ili izazivanje saobraćajnih nezgoda sa težim posljedicama. Posebno zabrinjava činjenica da se oštećene kocke nalaze na vanjskoj strani kružnog toka, gdje su brzina kretanja vozila i sile djelovanja veće, čime se rizik dodatno povećava. Iz navedenih razloga smatram da je neophodno da nadležne općinske službe, u saradnji sa stručnim i tehnički kvalifikovanim licima, u najkraćem mogućem roku izvrše sanaciju, stabilizaciju i trajno tehničko učvršćivanje oštećenih kamenih elemenata, kako bi se spriječila svaka potencijalna opasnost i osigurali uslovi za sigurno i nesmetano odvijanje saobraćaja na ovom značajnom saobraćajnom pravcu.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

- 14/17.** U ime korisnika socijalne zaštite pokrećem inicijativu za dopunu Odluke o zakupu stanova Općine Vogošća.

Obrazloženje:

Pokrećem inicijativu za dopunu Odluke o zakupu stanova Općine Vogošća, kojom se predlaže uvođenje posebne kategorije mladih koji izlaze iz sistema alternativne brige, a nemaju riješeno stambeno pitanje. Ovom inicijativom će se obuhvatiti mladi koji trenutno borave ili su boravili u institucijama socijalne zaštite ili u drugom obliku socijalne zaštite, upravo jer su ostali bez jednog ili oba roditelja i/ili zbog nastupanja drugih razloga koji obavezuju državu da pomogne djeci i mladima na adekvatan način i koji je u najboljem interesu djeteta. Sistem alternativne brige obuhvata institucije za djecu bez roditeljskog staranja i hraniteljske porodice koje imaju za cilj da pruže svaki oblik podrške djeci i mladima koji su ostali bez svojih roditelja i/ili drugih članova porodice. Slijedom svega navedenog, predstaviti ću dopune odredbi Odluke o zakupu stanova općine Vogošća, a ujedno i predstaviti kako bi norme izgledale u cjelini ako bi iste bili prihvaćene i usvojene od strane Općinskog vijeća Vogošće.

U članu 8. u stavu (1) dodaje se nova točka k) koja glasi: „k) Lica koja su izašla iz sistema alternativne brige i nemaju riješeno stambeno pitanje, a koja imaju prebivalište u općini Vogošća i nakon izlaska iz sistema alternativne brige.“

U članu 10. u stavu (1) dodaje se nova točka k) koja glasi: „k) Lica iz sistema alternativne brige. Podnosiocu zahtijeva koji je odrastao u sistemu alternative brige pripada 25 bodova.“ Lica predložena u članu 8. ove odluke imaju pravo na usluge socijalne zaštite do punoljetstva odnosno do kraja školovanja, a najkasnije do 27. godine života, a to su ustanove za djecu bez roditeljskog staranja i hraniteljske porodice i drugi oblici socijalne zaštite koji pružaju usluge u skladu s propisima koji regulišu socijalnu zaštitu. Nakon završetka školovanja mladi se suočavaju s nizom prepreka, a najvažnije od njih su rješavanje stambenog pitanja i pronalazak posla. Namjera ove inicijative jeste podrška pri rješavanju stambenog pitanja za mlade koji izlaze iz sistema alternativne brige, te da se prepozna ova kategorija mladih u našoj općini koji bez podrške institucija nisu u mogućnosti da samostalno riješe stambeno pitanje. Pozitivne prakse u ovoj oblasti su vidljive u Općini Centar i Općini Novo Sarajevo, a uskoro i u Općini Stari Grad. Zakonodavni organi navedenih općina su usvojili dopune odluka na način da su prepoznali mlade iz sistema

alternativne brige i omogućili im da po povoljnim cijenama zakupe stanove na kojima općine imaju pravo raspolaganja, a slijedom toga na narednoj sjednici Općinskog vijeća Stari Grad očekujemo iste rezultate, a to je da će i u ovoj općini mladi moći ostvariti pravo povoljnijeg zakupa stanova. Također i Općina Ilijaš ubrzano radi na rješavanju stambenog pitanja za mlade iz njene općine, što pokazuje pozitivne rezultate i odgovorne politike organa lokalne zajednice. Smatramo da bi usvajanje ove inicijative imalo višestruke pozitivne efekte, kako na socijalnu sigurnost mladih, tako i na dugoročni ostanak mladih u našoj lokalnoj zajednici. U nastavku predlažemo kako bi svaka odredba koja se dopunjuje, glasila ako bi se ova inicijativa usvojila i realizirala.

Član 8. (lica koja imaju pravo na zakup stana)

(1) Lica koja imaju pravo na zakup stana su:

- a) Članovi porodice šehida-poginulog borca, umrlih ratnih vojnih invalida, djeca poginulih, umrlih i nestalih branilaca, bez oba roditelja koji su bili pripadnici OS BIH,
- b) Ratni vojni invalidi,
- c) Demobilisani borci,
- d) Civilne žrtve rata sa stepenom oštećenja preko 50%,
- e) Lica koja u skladu sa Zakonom o socijalnoj zaštiti ostvaruju pravo na stalnu socijalnu pomoć,
- f) Raseljena lica koji zbog nemogućnosti obnove objekta prijeratnog prebivališta nisu do sada ostvarili povrat stanarskog prava ili vlasništva na području Općine Vogošća,
- g) Lica koja su nastavila da koriste općinske stanove nakon okončanog postupka za vraćanje stana općini ili su im izvršna rješenja o iseljenju odložena, pod uslovom da ispunjavaju uslove iz ove Odluke.
- h) Lica nesposobna za rad, lica sa mentalnim ili tjelesnim oštećenjem,
- i) Uposlenici jedinstvenog Općinskog organa uprave,
- j) Ostali građani koji nemaju riješeno stambeno pitanje,
- k) Lica koja su izašla iz sistema alternativne brige i nemaju riješeno stambeno pitanje, a koja imaju prebivalište u općini Vogošća i nakon izlaska iz sistema alternativne brige.

Član 10. (kriterij za bodovanje)

(1) Kriteriji za bodovanje u postupku utvrđivanja prava na zakup stana su:

- a) Neriješeno stambeno pitanje 50 bodova,
- b) Članovi porodičnog domaćinstva
za svakog člana i podnosioca zahtjeva..... 5 bodova,
- c) Učešće u ratu

Podnosiocu zahtjeva po osnovu učešća u oružanim snagama za svaki mjesec učešća u periodu od 04.05.1992 - 02.12.1995. godine pripada..... 0,5 bodova,

d) Šehidske porodice i porodice poginulog borca
podnosiocu zahtjeva kao članu porodičnog domaćinstva porodice šehida ili poginulog borca pripada..... 75 bodova,

- e) Ratni vojni invalidi
- prve kategorije..... 65 bodova,
- druge kategorije..... 60 bodova,
- treće kategorije..... 55 bodova,
- četvrte kategorije..... 50 bodova,
- pete kategorije..... 45 bodova,
- šeste kategorije..... 40 bodova,
- sedme kategorije..... 35 bodova,
- osme kategorije..... 30 bodova,
- devete kategorije..... 25 bodova,
- desete kategorije..... 20 bodova.

- f) Logoraši, civilne žrtve rata
- tjelesno oštećenje podnosioca zahtjeva od 80%-100% 30 bodova,
- tjelesno oštećenje podnosioca zahtjeva od 60%-80%..... 25 bodova,
- tjelesno oštećenje podnosioca zahtjeva od 40%-60%..... 20 bodova,
- tjelesno oštećenje podnosioca zahtjeva od 20%-40%..... 15 bodova.

g) Najviše ratno priznanje
podnosiocu zahtjeva dobitniku najvišeg ratnog priznanja, članu porodice poginulog, nestalog i umrlog dobitnika najvišeg ratnog priznanja pripada..... 40 bodova,

h) Ukupan radni staž

Podnosiocu zahtjeva za svaku godinu radnog staža pripada..... 1 bod,

i) Socijalno ugrožena lica

podnosioc zahtjeva koji ostvaruje pravo na socijalnu pomoć pripada 20 bodova,

j) Nesposobnost za rad, mentalna ili tjelesna oštećenja

Podnosiocu zahtjeva nesposobnom za rad, licu sa mentalnim ili tjelesnim oštećenjem pripada..... 30 bodova,

k) Lica iz sistema alternativne brige

Podnosiocu zahtjeva koji je odrastao u sistemu alternative brige pripada 25 bodova.

Vijećnik **Handžić Jasmin** (u ime Kluba vijećnika **SDA**) pokrenuo je slijedeće inicijative:

14/18. Pokrećem inicijativu u vezi sve češće pojave divljih deponija nakon uklanjanja kontejnera i uvođenja sistema zbrinjavanja otpada putem individualnih kanti.

Obrazloženje:

Naime, u dijelu prema Paljevu uočeno je nepropisno odlaganje otpada, uključujući kabasti otpad, građevinski materijal, pa čak i uginule životinje, što predstavlja ozbiljan problem za okoliš i zdravlje lokalnog stanovništva. Ovakvo nepropisno odlaganje otpada direktno ugrožava: čistoću i kvalitet zraka i tla, lokalne vodovode, s realnom opasnošću od kontaminacije i širenja zaraza, sigurnost i kvalitet života stanovnika ovog područja. S obzirom na navedeno, predlažem nadležnim institucijama da: organizuju pojačan nadzor, redovno obilaze terene, te uvedu jasno označene lokacije za odlaganje kabastog otpada, postavе informativne table i znakove zabrane sa preciznim kaznama za nepropisno odlaganje, razmotre mogućnost poboljšanja sistema zbrinjavanja otpada, hitno uklone postojeće divlje deponije kako bi se spriječilo širenje bolesti i negativnih posljedica po okoliš. Ovom inicijativom želimo skrenuti pažnju na potrebu za djelovanjem i očuvanjem okoliša, zdravlja i sigurnosti stanovnika područja Krivoglavaca.

14/19. Pokrećem inicijativu za pokretanje postupka akreditacije Srednjoškolskog centra Vogošća za provođenje programa obrazovanja odraslih.

Obrazloženje:

U savremenim uslovima tržišta rada sve je izraženija potreba za dodatnim obrazovanjem, prekvalifikacijom i usavršavanjem odraslih osoba, posebno nezaposlenih, radnika koji žele promijeniti zanimanje, kao i onih koji žele steći nova znanja i vještine u skladu s potrebama privrede. Općina Vogošća, kao lokalna zajednica sa razvijenim industrijskim i uslužnim sektorom, ima potrebu za kvalifikovanom radnom snagom, dok istovremeno postoji značajan broj građana koji su u potrazi za zaposlenjem ili mogućnošću profesionalnog napredovanja. Pokretanje akreditacije za obrazovanje odraslih bilo bi u skladu sa ciljevima Lokalnog akcionog plana zapošljavanja, te bi omogućilo da Srednjoškolski centar Vogošća postane ključni nosilac programa cjeloživotnog učenja na području općine. Akreditacijom bi se omogućilo:

- organizovanje programa prekvalifikacije i dokvalifikacije za deficitarna zanimanja,
- stručna osposobljavanja prema potrebama tržišta rada,
- podrška nezaposlenim osobama u sticanju novih kompetencija,
- jačanje konkurentnosti radne snage i smanjenje nezaposlenosti,
- dodatno pozicioniranje škole kao savremenog obrazovnog centra otvorenog za zajednicu.

Smatram da bi realizacija ove inicijative imala višestruke koristi za građane Vogošće, privredne subjekte i samu obrazovnu ustanovu, te doprinijela dugoročnom razvoju lokalne zajednice.

Vijećnica **Curić Samira** (u ime Kluba vijećnika **SDP**) pokrenula je slijedeću inicijativu:

14/20. Pokrećem inicijativu da se u okviru izmjena i dopuna Regulacionog plana „Donja Jošanica A faza“ izvrši uvrštavanje i plansko definisanje izgradnje pješačkog mosta u ulici Braće Kršo, na lokalitetu kod Likvala, koji bi povezivao naselje Donja Jošanica sa glavnom autobuskom stanicom. Ističem da je prethodno podnesena inicijativa za izgradnju navedenog mosta razmatrana, ali nije prihvaćena uz obrazloženje da predmetni most nije ucrtan u važeći Regulacioni plan, niti je obuhvaćen Programom prioriteta Općine Vogošća. S obzirom na navedeno, ovom inicijativom predlažem da se kroz izmjenu i dopunu Regulacionog plana otkloni planska prepreka, kako bi se u narednom periodu stvorili preduslovi za realizaciju ovog infrastrukturnog projekta. Posebno naglašavam da stanovnici

naselja Donja Jošanica već duži niz godina ukazuju na potrebu izgradnje ovog pješačkog mosta i grčevito se bore da se isti realizuje, jer bi njegova izgradnja značajno skratila svakodnevne pješačke rute prema glavnoj autobuskoj stanici, radnim mjestima, obrazovnim i drugim javnim institucijama. Trenutne alternativne pješačke komunikacije su znatno duže, neadekvatne i u pojedinim dijelovima nesigurne, što dodatno otežava svakodnevni život stanovnika ovog područja. Izgradnja pješačkog mosta imala bi višestruki značaj – unaprijedila bi sigurnost pješaka, poboljšala funkcionalnu povezanost naselja sa centralnim dijelom općine, te direktno doprinijela kvaliteti života stanovnika Donje Jošanice, što predstavlja legitiman i opravdan javni interes. Molim nadležnu Službu za urbanizam i prostorno planiranje Općine Vogošća da razmotri ovu inicijativu i u skladu sa zakonskim i planskim procedurama, pokrene postupak izmjene i dopune Regulacionog plana „Donja Jošanica A faza“.

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

- 14/21.** Pokrećem inicijativu za sanaciju oštećenja kanalizacione cijevi u ulici Donja Jošanica I kod broja 142.

Obrazloženje:

U vezi s inicijativom koja je podnesena na prethodnoj sjednici Općinskog vijeća, a odnosila se na sanaciju puta nakon radova na polaganju elektroenergetskih kablova u ulici Donja Jošanica I, ovim putem podnosim dopunu inicijative zbog novonastalog problema na terenu. Naime, iako je nadležna inspekcija izlazila na teren i prema dostupnim informacijama, naložila sanaciju, na lokaciji kod kućnog broja 142., došlo je do pucanja kanalizacione cijevi, što je rezultiralo izlivanjem kanalizacije. Prema navodima građana, do oštećenja je došlo kao posljedica ranije izvedenih radova na putu koje je izvodila firma angažovana na polaganju kablova za pojačanje elektroenergetske mreže. Osim problema s kanalizacijom, na više mjesta u ulici i dalje je prisutno propadanje kolovoza, što dodatno otežava kretanje i predstavlja sigurnosni i zdravstveni problem za stanovnike ovog područja. S tim u vezi, predlažemo hitnu sanaciju puknute kanalizacione cijevi i kvalitetnu i trajnu sanaciju kolovoza na oštećenim dijelovima.

Vijećnik **Turković Faruk (u ime Kluba vijećnika SDA)** pokrenuo je slijedeće inicijative:

- 14/22.** Pokrećem inicijativu da se uvede program „Zelena kartica Općine Vogošća“, kojim bi se uvele ciljane subvencije za unapređenje kvaliteta zraka u domaćinstvima na području općine. Izvor i iznos sredstava: Predlažem da Općina Vogošća, traži od Vlade Kantona Sarajevo, da obezbijede sredstva u minimalnom iznosu od 100.000,00 KM, kao namjenska sredstva iz kreditnog zaduženja Vlade Kantona Sarajevo, koje je realizovano s ciljem smanjenja zagađenja zraka. Namjena sredstava: Sredstva bi se koristila za subvencioniranje sljedećih mjera u domaćinstvima na području općine Vogošća:

- subvencije za nabavku HEPA uređaja za pročišćavanje zraka;
- subvencije za kupovinu anti-alergijskih filtera i pratećeg potrošnog materijala;
- subvencije za nabavku detektora kvaliteta zraka (CO₂, PM čestice) za domaćinstva;
- subvencije za laboratorijsko ili terensko testiranje prisutnosti plijesni i alergeni čestica u stambenim objektima;
- subvencije za nabavku anti-alergijskih zaštitnih materijala, s posebnim fokusom na djecu i osjetljive kategorije stanovništva.

Obrazloženje:

Kvalitet zraka na području Kantona Sarajevo predstavlja dugogodišnji i ozbiljan javnozdravstveni problem. Iako su sredstva iz kreditnog zaduženja prvenstveno usmjerena na smanjenje zagađenja vanjskog zraka, jasno je da se tim sredstvima ne mogu postići značajni i brzi efekti u kratkom roku. Brojna istraživanja pokazuju da građani najveći dio svog vremena provode u zatvorenim prostorima, gdje su često prisutni visoki nivoi prašine, plijesni, PM čestica, alergena i povišenih koncentracija CO₂. Takvi uslovi posebno negativno utiču na djecu, hronične bolesnike i starije osobe, što rezultira sve većim brojem respiratornih i alergijskih oboljenja građana. Predloženi program omogućava domaćinstvima da, kroz jednostavne, finansijski pristupačne i dokazano učinkovite mjere, značajno unaprijede kvalitet zraka u vlastitim domovima i smanje izloženost štetnim česticama i alergenima. Uvođenjem ove budžetske stavke, Općina Vogošća direktno ulaže u:

- zaštitu i unapređenje javnog zdravlja
- prevenciju respiratornih i alergijskih bolesti
- smanjenje dugoročnih troškova zdravstvenog sistema

- podizanje svijesti građana o važnosti kvaliteta zraka u zatvorenim prostorima.

Program je finansijski umjeren, ali donosi izuzetno visoku društvenu vrijednost, jer interveniše upravo tamo gdje je izloženost zagađenju najveća - u vlastitim domovima građana. Ova mjera je u skladu sa savremenim evropskim praksama, principima održivog razvoja i strateškim opredjeljenjima za unapređenje kvaliteta života, te predstavlja dugoročno održiv i lako primjenjiv model koji se može implementirati i u drugim općinama Kantona Sarajevo.

- 14/23.** Pokrećem inicijativu da se uspostavi poseban program u okviru „Zelene kartice Općine Vogošća“, pod nazivom „Čisto grijanje“, kojim bi se uvele ciljne subvencije za nabavku i ugradnju savremenih, energetski efikasnih i ekološki prihvatljivih sistema grijanja u domaćinstvima na području Općine Vogošća. Izvor i iznos sredstava: Inicijativu podnosim prema Vladi Kantona Sarajevo, te tražim od nadležne općinske službe da uputi pismo namjere i zahtjev prema Vladi KS radi obezbjeđenja namjenskih sredstava u minimalnom iznosu od 300.000,00 KM, iz kreditnog zaduženja Vlade Kantona Sarajevo ili drugih dostupnih fondova i budžetkih pozicija koji su namijenjeni smanjenju zagađenja zraka i unapređenju energetske efikasnosti. Namjena sredstava: Sredstva bi se koristila za subvencioniranje nabavke i ugradnje savremenih sistema grijanja u domaćinstvima, i to:
- subvencije za ugradnju toplinskih pumpi (zrak–zrak, zrak–voda, zemlja–voda)
 - subvencije za kondenzacione plinske kotlove visoke energetske efikasnosti
 - subvencije za peći i kotlove na pelet i biomasu sa niskom emisijom štetnih čestica
 - subvencije za električne i hibridne sisteme grijanja s visokom energetskom klasom
 - subvencije za troškove demontaže starih i neefikasnih sistema grijanja (ugalj, drva, lož-ulje)
 - subvencije za prateću opremu i radove koji doprinose energetskoj efikasnosti sistema grijanja.

Pravo na subvencije imali bi:

- domaćinstva sa djecom, starijim osobama i hroničnim bolesnicima,
- domaćinstva koja trenutno koriste čvrsta goriva,
- socijalno osjetljive kategorije stanovništva,
- privreni subjekti,
- objekti kolektivnog stanovanja.

Obrazloženje:

Individualna ložišta na čvrsta goriva predstavljaju jedan od najvećih izvora zagađenja zraka u Kantonu Sarajevo, posebno tokom zimskih mjeseci. Emisije $PM_{2.5}$ i PM_{10} čestica, sumpornih i azotnih oksida direktno su povezane s načinom grijanja domaćinstava, što značajno ugrožava zdravlje stanovništva. Zamjena zastarjelih i neefikasnih sistema grijanja savremenim, ekološki prihvatljivim rješenjima predstavlja najdirektniju i najefikasniju mjeru za dugoročno smanjenje zagađenja zraka. Ovakav pristup ne samo da smanjuje emisije štetnih čestica, već dugoročno donosi i finansijske uštede građanima kroz manju potrošnju energenata. Uvođenjem ove budžetske mjere, Vlada Kantona Sarajevo bi direktno doprinijela:

- smanjenju zagađenja zraka i emisije štetnih čestica
- zaštiti javnog zdravlja i smanjenju respiratornih oboljenja
- energetske tranziciji i modernizaciji domaćinstava
- smanjenju energetskog siromaštva
- ispunjavanju strateških ciljeva Kantona Sarajevo u oblasti okoliša i klimatskih politika.

Program „Čisto grijanje“ je finansijski zahtjevniji od pojedinačnih kratkoročnih mjera, ali predstavlja najisplativiju dugoročnu investiciju, jer trajno rješava uzrok zagađenja, a ne samo njegove posljedice. Ova inicijativa je u potpunosti usklađena sa savremenim evropskim praksama, principima održivog razvoja i postojećim strateškim dokumentima Kantona Sarajevo, te je logičan i nužan dio programa „Zelena kartica Općine Vogošća“.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 14/24.** Pokrećem inicijativu prema Ministarstvu za odgoj i obrazovanje Kantona Sarajevo i JU Osnovnoj muzičkoj školi „Mladen Pozajić“ Sarajevo: predlažem da ogranak Osnovne muzičke škole „Mladen Pozajić“ u Vogošći nosi ime „Halid Bešlić“. Ideja da se područno odjeljenje Osnovne muzičke škole „Mladen Pozajić“ u Vogošći nazove po Halidu Bešliću proizlazi iz dubokog poštovanja građana prema njegovom životnom i umjetničkom djelu. Halid Bešlić bio je umjetnik čiji je rad ostavio neizbrisiv trag u bosanskohercegovačkoj

kulturi, a njegove pjesme obilježile su generacije i postale dio zajedničkog identiteta našeg društva. Osim izuzetnog doprinosa muzičkoj sceni, Halid Bešlić bio je poznat po svojoj skromnosti, humanosti i spremnosti da pomogne svakome kome je pomoć bila potrebna. Posebno je važno naglasiti da je Halid Bešlić bio dugogodišnji stanovnik općine Vogošća, gdje je kroz svoj rad i društveno angažovanje ostavio veliki trag. Građani Vogošće s ponosom ističu da je Halid bio "jedan od nas" – neko ko je svojom dobrotom, prisutnošću i pristupačnošću doprinio razvoju zajedništva i pozitivnih vrijednosti. Nazivanje područnog odjeljenja Osnovne muzičke škole njegovim imenom predstavljalo bi trajno priznanje njegovog umjetničkog naslijeđa, ali i snažnu poruku mladim generacijama o važnosti njegovanja kulture, humanosti i lokalnog identiteta. Time bi smo podstakli učenike da rastu uz primjer čovjeka koji je svojim talentom, ali prije svega dobrotom, postao jedan od najvoljenijih umjetnika našeg vremena.

- 14/25.** Inicijativa za formiranje Punkta za prijem uzoraka za mikrobiološke pretrage humanog materijala jedinice za mikrobiologiju ZJZKS na lokaciji DZ Vogošća. Shodno članu 33. Zakona o zdravstvenoj zaštiti Federacije BiH („Službene novine Federacije BiH“, broj: 46/10) koji glasi: u cilju osiguranja potrebne dostupnosti zdravstvene zaštite primarna zdravstvena zaštita organizira se tako da je korisnicima dostupna u općini njihovog prebivališta, pokrećem inicijativu za formiranje punkta Zavoda za javno zdravstvo Kantona Sarajevo u DZ VOGOŠĆA na kojem bi se vršio prijem uzoraka za mikrobiološku obradu, po uzoru na isti za područje Općine Novi grad, a koji se nalazi u prostoru JUDZKS OJ Novi grad/Centralni objekat. DZ Vogošća bi obezbjedio prostor, dio opreme i logističku podršku za potrebe instaliranja informatičke opreme, a ZJZKS bi preraspodjelom *kadra* obezbjedio pravilan i pravovremen način preuzimanja ovih uzoraka.

Obrazloženje:

Zavod za javno zdravstvo Kantona Sarajevo je zdravstvena ustanova kojoj je glavni sadržaj rada javnozdravstvena djelatnost, što znači da kroz promociju zdravlja brine o zdravlju stanovništva, a ne pojedinca. U svom radu obavljaju i mikrobiološke pretrage humanog materijala kroz jedinicu za mikrobiologiju. <https://zjzks.ba>. Usluge prijema uzoraka u Kantonu Sarajevo vrše na dva punkta: Dr. Mustafe Pintola 1, Općina Ilidža i Bulevar Meše Selimovića 2, općina Stari Grad. Ove lokacije su od Centralnog objekta DZ Vogošća udaljene 14 i 18 km, od Centralnog objekta DZ Ilijaš 26 i 25 km, te zahtijevaju korištenje više vrsta javnog prijevoza u trajanju preko jednog i po sata. Privatno usluge koštaju oko 25,00 KM. Postoje brojne zakonske i podzakonske regulative koje se tiču predmeta ove inicijative, a to su u prvom redu :

1. Zakon o zdravstvenoj zaštiti Federacije BiH („Službene novine Federacije BiH“, broj: 46/10) kroz slijedeće članove:
 - Član 12. (Društvena briga za zdravlje pod jednakim uvjetima na teritoriji Federacije ostvaruje se osiguranjem zdravstvene zaštite stanovništvu Federacije, kao i grupacijama stanovništva koje su izložene povećanom riziku obolijevanja, zdravstvenom zaštitom osoba u vezi sa sprečavanjem, suzbijanjem, ranim otkrivanjem i liječenjem bolesti od većeg socijalno-medicinskog značaja, kao i zdravstvenom zaštitom socijalno ugroženog stanovništva).
 - Član 14. (Društvena briga za zdravlje na nivou općine obuhvata ocjenjivanje rada zdravstvenih ustanova i kvaliteta zdravstvenih usluga, kao i osiguranje finansijskih sredstava za unapređenje njihovog rada i kvaliteta zdravstvenih usluga u skladu sa potrebama stanovništva i mogućnostima jedinice lokalne samouprave u skladu sa posebnim zakonom o principima lokalne samouprave u Federaciji).
 - Poglavlje III (Član 18. načelo dostupnosti zdravstvene zaštite; Član 19. načelo pravičnosti; Član 20. načelo solidarnosti; Član 25. načelo efikasnosti).
2. Zakon o zabrani diskriminacije BiH („Službeni glasnik BiH“, broj: 59/09):
 - Član 1. (Ovim Zakonom uspostavlja se okvir za ostvarivanje jednakih prava i mogućnosti svim licima u Bosni i Hercegovini i uređuje sistem zaštite od diskriminacije. (2) U skladu sa Ustavom Bosne i Hercegovine i međunarodnim standardima koji se odnose na ljudska prava i osnovne slobode, ovim zakonom utvrđuju se odgovornosti i obaveze zakonodavne, sudske i izvršne vlasti u Bosni i Hercegovini, kao i pravnih lica i pojedinaca koji vrše javna ovlaštenja (u daljnjem tekstu: nadležne institucije Bosne i Hercegovine), da svojim djelovanjem omoguće zaštitu, promoviranje i stvaranje uslova za jednako postupanje.)
 - Član 2. st.2 (Zabrana diskriminacije primjenjuje se na sve javne organe kao i na sva fizička ili pravna lica, i u javnom i u privatnom sektoru, u svim oblastima, a naročito: zaposlenja, članstva u profesionalnim organizacijama, obrazovanja, obuke, stanovanja, zdravstva, socijalne zaštite, dobara i usluga namijenjenih javnosti i javnim mjestima, te obavljanja privrednih aktivnosti i javnih usluga.)

Zaključak:

Na osnovu svega dostavljenog smatramo da postoji osnova za formiranje Punkta za prijem uzoraka za mikrobiološke pretrage humanog materijala jedinice za mikrobiologiju ZJZKS na lokaciji DZ Vogošća. DZ Vogošća ima obezbjeđene uslove za rad u vidu prostora, dijela opreme, kao i logističku podršku za instaliranje informatičke opreme. ZJZKS bi preraspodjelom kadra obezbjeđio pravilan i pravovremen način preuzimanja ovih uzoraka, a što bi na mnogo načina unaprijedilo dostupnost zdravstvene zaštite stanovništva općina Vogošća, ali i stanovnicima Ilijaša, zbog geografske blizine a sve u cilju bržeg, jednostavnijeg i efikasnijeg pristupa uslugama.

Vijećnik **Kulo Muamer (u ime Kluba vijećnika SDA)** pokrenuo je slijedeću inicijativu:

- 14/26.** Pokrećem inicijativu prema nadležnoj Službi Općine za izgradnju dječijeg igrališta na području MZ Semizovac.

Obrazloženje:

Na području MZ Semizovac trenutno ne postoji izgrađeno dječije igralište, te shodno tome potrebno je izvršiti utvrđivanje lokacije na kojoj bi se izgradilo navedeno igralište.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

- 14/27.** Pokrećem inicijativu prema Direkciji za puteve Kantona Sarajevo i Ministarstvu za saobraćaj Kantona Sarajevo za reviziju i unapređenje pješačke sigurnosti uz kantonalne ceste na području općine Vogošća.

Obrazloženje:

Upućujem inicijativu Direkciji za puteve Kantona Sarajevo i Ministarstvu saobraćaja Kantona Sarajevo da se izvrši sveobuhvatna terenska revizija sigurnosti pješaka uz kantonalne ceste koje prolaze kroz naseljena područja općine Vogošća. Na pojedinim dionicama kantonalnih saobraćajnica uočava se:

- nedostatak ili prekid pješačkih staza,
- neadekvatna ili oštećena pješačka signalizacija,
- neosvijetljeni pješački prelazi,
- povećan rizik za pješake, naročito djecu, starije osobe i osobe sa invaliditetom.

Ovom inicijativom predlažem da Direkcija za puteve Kantona Sarajevo u saradnji sa Ministarstvom saobraćaja Kantona Sarajevo:

- izvrši terenski pregled i identifikaciju rizičnih tačaka,
- predloži kratkoročne mjere u smislu signalizacija, obilježavanje, rasvjeta pješačkih staza,
- u srednjoročnom planu predvidi izgradnju ili proširenje pješačke infrastrukture, tamo gdje je to opravdano.

Cilj inicijative je povećanje sigurnosti svih učesnika u saobraćaju, smanjenje rizika od saobraćajnih nezgoda i unapređenje kvaliteta života građana općine Vogošća.

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

- 14/28.** Na osnovu uočenih problema saobraćaja preko pješačkog prelaza i radi unapređenja bezbjednosti građana i djece, podnosim inicijativu da se izvrši adekvatno osvijetljenje pješačkog prelaza na magistralnom putu M18, u neposrednoj blizini tzv. plavih zgrada, prema naselju Rosulje.

Obrazloženje:

Na navedenoj lokaciji pješački prelaz je slabo vidljiv, naročito u večernjim i noćnim satima, kao i u uslovima smanjenje vidljivosti/kiša, magla i druge vremenske neprilike). S obzirom na gust saobraćaj i veliki broj pješaka koji svakodnevno koriste ovaj prelaz, postoji realna opasnost od saobraćajnih nezgoda i ugrožavanja bezbjednosti pješaka, a pogotovo djece. Postavljanjem adekvatne rasvjete (posebnih reflektora ili pojačane rasvjete usmjerene ka pješačkom prelazu) značajno bi doprinjelo boljoj uočljivosti prelaza pješaka, povećanju sigurnosti svih učesnika u saobraćaju, te prevenciju mogućih saobraćajnih nezgoda na ovom dijelu magistralnog puta. S tim u vezi, predlažem da nadležna općinska služba u saradnji sa nadležnim institucijama viših nivoa vlasti i upraviteljem puta, izvrši uvid na terenu i poduzme sve potrebne mjere kako bi se pješački prelaz na ovoj lokaciji što hitnije i adekvatno osvijetlio. Kao primjer navodim osvijetljeni pješački prelaz u ulici Jošanička od „MEGA Diskonta“, prema podvožnjaku ulice Tome Mendeša.

14/29. Pokrećem vijećničku inicijativu za uvođenje posebnog edukativnog časa u nastavni program osnovnih škola na području općine Vogošća.

Obrazloženje:

Uzimajući u obzir sve izraženije izazove u odrastanju djece i mladih na području općine Vogošća, posebno u pogledu vršnjačkog nasilja, maloljetničke delikvencije, bezbjednosti u saobraćaju, te prevencije upotrebe droge i drugih opojnih supstanci, pokrećem ovu inicijativu s ciljem jačanja preventivnog djelovanja kroz sistem osnovnog obrazovanja. Predlažem da se uvede poseban edukativni čas u nastavni program svih osnovnih škola na području općine Vogošća, koji bi se realizovao periodično (npr. jednom mjesečno ili po utvrđenom planu), a bio bi usmjeren na:

1. prevenciju vršnjačkog nasilja i razvoj nenasilne komunikacije.
2. prevenciju maloljetničke delikvencije i upoznavanje sa zakonskim i društvenim posljedicama rizičnih ponašanja
3. edukaciju učenika o pravilima bezbjednog i odgovornog ponašanja u saobraćaju
4. prevenciju upotrebe droge, alkohola, i drugih opojnih supstanci, uz jasno ukazivanje na štetne zdravstvene i društvene posljedice.

Nosioci i učesnici u realizaciji ove inicijative bili bi:

1. Osnovne škole na području općine Vogošća, kroz realizaciju edukativnih časova.
2. Nadležna općinska služba za društvene djelatnosti kao koordinator aktivnosti.
3. Ministarstvo za odgoj i obrazovanje Kantona Sarajevo, u dijelu davanja saglasnosti i usklađivanje sa nastavnim planom i programom.
4. Ministarstvo unutrašnjih poslova Kantona Sarajevo i PU Vogošća, kroz edukacije iz oblasti prevencije nasilja, maloljetničke delikvencije i bezbjednosti u saobraćaju.
5. JU Dom zdravlja Kantona Sarajevo - Organizaciona jedinica Vogošća, kroz zdravstveno- edukativna predavanja o štetnosti droge, alkohola i drugih opojnih supstanci.
6. JU Centar za socijalni rad Kantona Sarajevo-Služba Vogošća, kroz savjetodavni i preventivni rad sa djecom i roditeljima.
7. Školski pedagozi, psiholozi i drugi stručni saradnici.

Smatram da bi ovako organizovan i koordinisan preventivni program značajno doprinio stvaranju sigurnijeg školskog okruženja, pravilnom razvoju djece, mladih i roditelja, te dugoročno smanjio razne oblike nasilja i neprihvatljivog ponašanja. Zamolio bih Općinsko vijeće da razmotri i usvoji ovu inicijativu, a nadležne navedene institucije da u skladu sa svojim nadležnostima preduzmu potrebne aktivnosti radi njene realizacije.

Vijećnik **Bogilović Enis (u ime Kluba vijećnika NiP)** pokrenuo je slijedeću inicijativu:

14/30. Pokrećem inicijativu da se velika sala Općine Vogošća sanira, da se zamjeni etison, očiste stolice i da se osvježi.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir